

77

1614

103

3095

LE
PACIFIQUE
OV
AVANT-COUREUR
DE LA PAIX.

A PARIS,

M. DC. XIV.

8 pp
coll
on d

33 p. 2. P. 2. V. (1614)

ACC 83-101 (103)

THE
PACIFIC
OCEAN
NAVY
DE LA PAIX

A PARIS
MDCXIV



LE PACIFIQUE OV AVANT- coureur de la Paix.



Le grand Alexandre apporta du ventre de sa mere des marques de sa grandeur future, qui meurent son pere à le faire esleuer curieusement, afin que sa nourriture ne degenerast à ce que sa naissance promettoit. Il n'y a personne qui n'ait recognu en l'heureuse venue de nostre Roy, qu'elle promettoit à son peuple toutes les felicittez qu'il pouuoit souhaiter. Et quoy qu'il semble que quelques esprits bouillans s'y soient voulus opposer, neantmoins leurs factions n'ont esté de duree: car ils se sont representez que l'influence de celuy contre lequel ils vouloient décocher leurs traiçts le pouoit accabler en vn moment, car nostre Roy, fils de ce grand HENRY, non moins iudicieux que vaillant, retient de son pere la generosité & magnanimité qui rendent ses armes tant inuincibles, que les plus secrettes machinatiōs que les turbulens voudroiēt ourdir, sont suiues d'un repētir auparavant que d'estre escluses, le Iupiter de la France faisant vne simple demonstration d'eslancer son foudre.

Ainsi est-il de toutes resolutions prises avec chaleur, les propositions en plaisent de prime abord, les esprits intemperez ont cela de particulier qu'ils font croire toutes leurs entreprises belles, hautes, & faciles à ceux qui croient des imaginations pour verité: mais l'execution en est toujours plus difficile, le succez plus mal-heureux, & le plus souuent ceux qui sont aduantageux en paroles sont les plus tardifs aux effects: ils ont de l'assurance à conseiller les rancœurs & seditions, mais ils n'ont pas le courage de venir aux mains, & au contraire ceux qui ayment le bien commun sont plus retenus à leuer les armes plus hardis à les mettre en campagne, & plus heureux à les conduire. C'est Messieurs ce que ce Forgeron resuscité depuis n'agueres m'a dict auoir obmis à mettre en la declaration qu'il feist il y a quelques iours en public, pour y publier qu'il a appris à chanter la Palinodie, & adjouste que la conference qu'il auoit eue autresfois d'un homme aduisé & versé aux bonnes lettres luy auoit appris que les Dieux voulant choisir celuy d'entre eux qui auroit la protection d'Athenes, resolurent de la donner à celuy qui mettroit sur le tapis ce, qui seroit le plus nécessaire au bien de l'homme. Neptune offrit vn cheual armé, pour à mon aduis, signifier la guerre, ce qui luy fut imputé à inconstance, & legereté. Minerue au contraire, Deesse iudicieuse presenta vne Oliue, disant que fruiçts doux ne se peuuent moissonner seulement qu'en vne saison tranquille & pleine de repos. Ces choses offertes au Consistoire des Dieux, & debatues par l'une & l'autre brigade, & equitablement balancée par Iupiter, furent adiu-

gées au profit de Minerve, plus digne de triompher par le bon-heur de la Paix, que Neptune par les fureurs de ses armes.

Plusieurs, me dict-il, sont bien trompez, car ils pensoient que ce feu fust allumé aux quatre coins & au milieu, mais leurs soufflets perdent leur vent, ils ne le peuvent allumer & la chaleur y manque, faute de bois propre. Nostre ouurage bien souuent est comme la thoile d'araigne, qui nous emprisonne avec nostre butin. Mais quoy, nous ne sommes iamais sages que nous ne reuenions des plaids.

L'Almanach de Mauregard ne se trouue veritable, & a mesme trompé son maistre. La preuoyence sert de beaucoup aux succez. Mais encore suis-ie de l'aduis de Platon en ce qu'il croit qu'en la guerre vne grâde fortune y est necessaire afin qu'assisté du Ciel, la terre ne puisse resister.

Il y en a qui sont nez en la quatriesme Lune, qui ont en leur maison le Cheual Sejan, quelques choses qu'ils entreprennent ne leur peuvent reüssir. D'autres, que mesmes les plus grandes tempestes ne les osent assaillir.

A iuste tiltre Miltiades demandoit aux Atheniens de porter sur la teste vn chapeau d'Oliues pource, disoit-il, que s'il n'auoit seul vaincu, au moins estoit-il seul qui auoit procuré la Paix de la Grece. Ce fut la fin du discours de ce Forgeron qui me fit croire qu'il tendoit en brisant, & mettant en pieces les armes qui sont sorties de sa forge, à remporter le mesme honneur que Miltiades.

Vne goutte d'huile gaste bien tout vn muid de vin, mais l'Ambicieux ne gaste pas toute vne as-

semblee, & puis les Rois, & les Princes, ont de bonnes genies qui veillent à leur salut. L'ambition des plus grands a esté la premiere cause de leur cheute: le desir d'une entiere domination leur a faict consommer leur aage avec plus de fueilles que de fruiets. Le defunct Roy (que Dieu absolue) au plus haut de sa fortune se representant les maux qu'apporte la guerre, a aymé mieux se maintenir en paix, considerant que ses subjects en pourroient pastir.

C'est vne belle chose d'estre entre les hommes reputé illustre, donner temps à sa colere & pourchasser la Paix, estre debonnaire & clement afin que les sujets ayent plus de crainte pour luy que de luy.

Crions la Paix pour proverbe commun de nostre felicité, la Paix donc, la Paix, & ne croyons point à ces esprits remuans puisque, *bien heureux sont les pieds de ceux qui vont annoncant la Paix.* Nous n'auons pas qu'à peine despoüillé la cuirasse, voulons nous desia remettre l'espée au poing, & encore contre ceux que nous iugeons dignes de nostre Paix.


Nous dirons donc le bon-heur des François est esclous, que leur franchise est asseuree, que ce qui nous pouuoit menacer est destruit. La France qui sembloit encor soupirer ses dernieres plaintes, aspire maintenant à de longues prosperitez. Le Roy dignement esleué à plustost vaincu que combatu ceux qui sembloient vouloir s'opposer à sa Royale Majesté, & participant à ceste debonnaireté de la Royne, il ne desire rien plus que le salut de ses subjects. Son courage le sçaura bien garentir des embusches de ses aduersaires. Et ce-

ste courtoisie luy fera procurer la tranquillité & le repos des siens. On lit des-ja à son visage les traicts remarquables de ses trophées aduenir: & à la douceur de ses yeux, les apparences futures du bon-heur de la France. Le ciel arbitre des differens prononce ce sacré mot de Paix, par le commun desir des Prouinces: la colonne des loix, la consolation des gens de bien, la ruyne des meschans, la gloire de Dieu, la perle des couronnes, la tutrice des arts, la source de tous biens, qui rend l'ordre aux Estats, & par l'ordre remet leurs forces en nature, qui en sont tousiours chassées par les guerres & diuisions, & qui ne peut estre desagregable, sinon à ceux qui se plaisent aux massacres de leurs freres pour l'assouuissement de leur rage, & comme vn Fabius Maximus veut mesnager la vie & le repos de ses subjects, par lesquels il puisse quelque iour faire ressentir aux Idolatres la force de ses bras.

C'est assez combatu & debatü par le tranchant, il est temps de tenir les armes basses, & esleuer l'olue au dessus de la palme: Reprenons donc nos esprits, non pour continuer nos differens par le fer, mais pour remettre eternellement à la prouidence de Dieu le gouvernement du monde: Espargnons le sang des subjects, espanché par tant de guerres intestines: Bornons nos ambitions de limites immuables, de mers, fleues & montaignes qui separent nos heritages: Et pour ces glorieux tiltres de vaillans, de forceurs de villes, d'Aigles & de conquerans, que la guerre nous ont acquis (ce sont tiltres plus dignes de ces Princes Payens qui les auoient vsurpez, que non de Roy tres-Chrestien & Catholique) le

Roy prendra & en tiltre & en effect ce beau nom de Pasteur de son peuple, & pere des Subjects qui font hommage à ses couronnes.

Le Lyon ne combat que les animaux qu'il estime dignes de sa colere: l'Aigle ne veut chasser aux mousches, le Leopard ayme mieux se precipiter que faire vn amour indigne de son ambition; la Licorne se blesse elle mesme plustost que d'assaillir vn moindre qu'elle; il n'est donc pas honorable à sa Majesté de venir aux mains avec ceux qui n'oseroient attendre le choc de ses armes: Il vaut mieux qu'il les laisse en Paix, en conseruant l'honneur qu'il a sceu acquerir aux despens des plus redoutables, que de l'amoinrir par vne victoire si facile. C'est l'ordinaire des courageux de chercher les occasions de pouuoir faire quelque action recommandable par la clemence. Cesar mesme se fascha de ne pouuoir obliger Pompee, & eust quasi voulu n'estre pas victorieux puis qu'il ne pouuoit iouyr du contentement qu'il se promettoit: mais la clemence & debonnaireté de nostre Roy, ioincte à ses forces inuincibles, l'vn & l'autre dignement administree par la sage & prudente conduicte de la Royne Regente sa mere, fournit à toute la France vn spectacle admirable de son heur par la sousmission de deuoir & seruice à leurs Majestez, & à l'Estat, que leur font à present tous leurs subjects de quelque qualité & condition qu'ils soient: & en ceste bonne volonté plaise à Dieu les continuer, afin que le regne de l'vn, & la regence de l'autre soient bien-heurez de la Paix au Ciel, comme ils sont en terre.



Digitized by the Internet Archive
in 2010 with funding from
University of Ottawa

